

Crónica Artieda'09. Esfendemos a tierra

A ENRESTIDA :: 24/07/2009

O 18 de chulio tornaba por segunda begada t?Artieda o festibal choben independentista en contra de l'esferra y barbarie de l'entibo de YESA.

Una fiesta ta trucar o ficazio de toz os gobernans que, limpio expropiar y fer leis antimeyoambientals, quieren deixar bueda la montaña aragonesa.

Dimpués de zinco añadas tornábanos enta Artieda, a plegada no se les feba difízil a los que por ixas calendatas ya i estión, pero ista begada bi eba muita chen choben nueva. Nuevas zonas d'acampadas distribuyidas en trazas por a chen d'o lugar y a organización ta que os rezien plegaus isen acampando.

Chusto antis de zenar a casa de reunions d'o lugar fería buena onra ta combocar a toz os militans d'o MLNA ta una rufierta. Ista rufierta sería o punto de trobada de chen que por trobar-se bibindo en otros puestos d'o País no gosan partizipar d'o debate politico que muitas begadas se zentraliza en Zaragoza. Artieda, Chaca, Canfranc, Zinco Billas, Llitera, Ribagorza, Uesca,... con Puyalón, Chobenalla, U.C.A., Astral y A Enrestida i serían representaus. O debate politico dio paso enta la zena y posterior fiesta con os Dj's cangrajeros d'a Llitera. Punchadiscos de soul, reggea, ska,... incansables fendo bullir a borina d'a tabierna d'Artieda, tot charrando en roldes talmén d'a próxima campaña en contra de Yesa, u d'o BIC, ...

O maitino d'o sabado sería pleno d'arribadas. A primera d'unos personaches bestius de berdes que feban creyer que tot ye suyo, dondiando por as zonas d'acampadas identificando-ie toz os asistens. Afortunadamén o buen fer d'as chens d'Artieda remeró de qui yeran ixas tierras. A segunda arribada más falagosa, d'os compañers benius en bus dende Zaragoza y Uesca.

Luis Solana, presidén de l'asoziazión Río Aragón y exalcalde d'Artieda, ufrió una completa charrada sobre a situación de l'entibo de Yesa, qui millor que el ta explica-lo y fendo serbir a luenga aragonesa.

A l'ora d'a chenta ya se iría beyendo una mayor afluyenzia d'a chen. As chentas, zenas,.. han estua uno d'os prenzipals puestos de trobada. As largas mesas feban de soporte ta las charradas y degustazions. Ya a las 5 d'a tardi d'o sabado os diferens colectibos y distribuideras i fueron montando os suyos puestos de materials ta dar a conoixer as actibidaz, campañas, zentros sozials,... que funzionan a l'arreu d'Aragón. Os chuegos tradizionals en a plaza dio paso a o pasabillas que esnabesó lo lugar durante 2 oras y meya; o momento an que más de 300 personas se chuntón en o preto d'o lugar.

Ya de nueis a mosica d'as collas como Prau, Azero, Txirigol, El trono de Judas,... irían puyando o bolumen d'os chilos y borina en o pabellón d'o lugar. Entre colla y colla un acto politico con a lectura d'un manifiesto en favor d'a esfensa d'a Tierra y en contra de l'entibo de Yesa; siempre con o refirme d'o bloque independentista de cuchas enta la chen d'Artieda

y redolada.

A tornada sería dura, pero siempre queda o poso d'ixa nueva chen conoixida, d'ixos nuevos prochectos fablaus,... y d'un nuevo festibal an que trobar-nos bien luego.

https://www.lahaine.org/mm_ss_est_esp.php/cronica-artieda-09-esfendemos-a-tierra